

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839 O LE SULU SAMOA MATI 2024**

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 29 - website: [www.cccs.org.ws](http://www.cccs.org.ws)


***OSIGA FEAGAIGA EFKS LETUI***



***AUE! UA MALILIU TOA!***

***MAOTA FAAFEAGAIGA***

***EFKS SALEIMOA***



# FAASINO UPU

1. O LE LAUGA	2
2. MALIU & TOETU IA MATI	3
3. OSIGA FEAGAIGA EFKS LETUI	4
4. MALIU IOANE VILIAMU	5
5. SULU & MOLI O LE ALA	6
6. O LE PEROFETA MULIMULI	7
7. FAASOLOGA FONOTELE 2024	8
8. O E UA MALILIU	14
9. ATA O MATAUPU LOMIA	16

## O LE LAUGA

Tusi Faitau: Ioane 13: 1 – 11

Matua: Ioane 13, “5 Ona liligi lea e ia o le vai i le ipu e mulumulu ai, ua mulumulu i vae o ona soo, ma sōloi ai i le solo ua ia fusi ai.”

Manatu Autu: **O le Tautua Tuavae, o le Faiva o le Kerisiano.**

Ua uma ona tofofi e le Atua o ta faiva ma o ta valaauina. E eseese foi o ta valaauina ma faiva ua tofia i ai i tatou e le Atua. A o valaauina uma, e tasi lona faamoemoe, ina ia tautuaina ai le Atua ma Lona finagalo. O le tautua lava ia i le vaai a le Samoa, o le tagata e galue mai tuāfalē, auā le tausiga o le maota o matai, i totonu o faiganuu. A e i totonu o aiga, o le tautua tuavae, o le tagata e nofo i totonu o le aiga. E fai le fatuaiga tausi. E tautua le sa’o, aemaise o le tausiga o matua ma le aiga. E lē lagona sona leo. E fai ma le faamaoni ona tiute, e palapalā mai lava i le taeao, e po lava o palapalā. E susū foi i le aso atoa, a e fai mea uma ma le fiafia, auā ua talitonu i manuia o le ola tautua.

O manuia e au tupulagā, e manuia ai fanau, o fanau a fanau, ma fanau a fanau a fanau. A e tataua ona malamalama le tagata tautua, a lē lelei ona fai le faiva o le tautua, e inu i mala e au tupulagā. Le tautua lea na faatino e o tatou tua’ā ma matua ua tofafa mai ti’asā. E le gata o le tautuaina o aiga, a o le tautuaina foi o nuu ma afioaga. A e na matua

le tuu i le Tala Lelei a Keriso. Tiga le mativa ma le lē tagolima, a e sa ofo mea uma, sa ofo atoa le ola auā le tautuaina o le Lotu. Sa taoama foi o latou mamalu faaleaganuu, a e ave le faaeaea ia Iesu ma Lana feau. O le tautua sa faia ma le loto talitonu i le Atua, aemaise ai o le talitonuga sa soifua ma ola ai, ***O le ala i le pule o le tautua.***

Le tautua lea e mafai ona faamatalaina ai le galuega na faia e Iesu i ona soo. I le taimi o la latou paseka faai’u, a o aga atu le Alii i ona puapuaga. Ua tula’i o la faapei o se tautua, o le apa ma le solo, e leai foi ma se tala, a e ua galue faapei o se auauna. Ua taoama foi ona mamalu, o la o le Tupu, o le Matai, a e ua faatino le faiva o le tautua. A e o le manulaufi lea o Lana galuega, o le auauna atu. A o le molimau a Isaia, o la lava o se auauna puapuagatia. O lea foi na saunoa manino le Alii, “45 Auā foi o le Atalii o le tagata na lē sau o ia ina ia auauna tagata ia te ia, a e peitai ia auauna o ia, ma foaiina atu lona ola o le togiola mo tagata e toatele.” Mareko 10. O le galuega na faia e Iesu, e lē o se galuega e tataua ma la. Auā o le mulumuluina o vae, o le tiute o le pologa ma le auauna, i le tu ma le aganuu a Iutaia. O se aganuu talimalo ua masani ai. Peitai o lea ua faatino e Iesu, e ui ina o la o le Matai. Atonu o le mafuaaga lea, o le musu o Peteru, e mulumulu e Iesu o ona vae. Auā o loo ia iloa lelei, o Iesu o lona Matai, o le Faaola, a o le Alo o le Atua. Peitai ua faia e Iesu le faata’ita’iga o le tautua, ina ia mulimulita’i i ai ona soo. Ina ia iloa e ona soo, o le faamoemoe lea o lo latou valaauina, ia avea ma auauna, e fai le faiva o le tautua, auā le ola manuia o tagata.

Ua silafia lelei e le Alii, e lē faigofie le galuega o le a tuua i ona au soo. A o le mea ua la faia o se faamalosi lea mo i latou, ma faamanatu i ona soo, o le galuega e fai i le loto maulalo. Ia lagona e le tagata lona faatauva, e talia ai lu’itau o le galuega tautua, a o le manuia foi lena o le galuega, ia faia i ala ua faasino mai e Lē ou le galuega. O le mea moni ua silafia lelei e Iesu, e lē faigofie i Ona soo, ona toe o ifo i lalo e fai le faiva o le tautua. Auā e toatele ua manatu, o lo latou avea ma soo, o se tofiga taualoa, a o se faaeaea maualuga. A o lea ua avatu e Iesu le faaitaiga. Ua tula’i, ua laei e pei o se pologa, ma faatino loa le tautua tuāvae.

---

O le feau lea o le Tala Lelei mo i tatou uma. O le mea ua faia e Iesu, o Lona finagalo lea mo i tatou, e ao ona tatou faia. O lo tatou valaauina lea, ma lo tatou faiva, na tofofi mai e le Atua, oe le kerisiano, oe le tagata faatauva, aemaise le Ekalesia. O i tatou lava o auauna, e faia le faiva o le tautua. Le tautua tuāvae ia Iesu Keriso ma le Tala Lelei. Ia fai i tatou ma pologa ona o Iesu ma Lana feau. E le faigofie le avea ma kerisiano, aemaise le galuega tautua i le Atua. O le mea moni ua e tigaina, ua e lailoa, ua e mafatia, ona o le Atua ma Lana galuega. O lo ta valaauina lena. O le ta faiva lena. A e aua nei galo, e lē o se mea faalēaogā lo outou tautigā ona o le Alii. E lē pa'ū fua lou afu, e lē to-i-moanaina lo outou fatu-atia, ma lo outou gapatia, auā e lē puaoa le lagi i le silafaga ati a le Atua. O afuaga na o manuia o tatou aiga ma a tatou fanau, o tatou nuu, aemaise o le Ekalesia a Keriso. E afua mai ina ua faia ma le faamaoni la tatou tautua i le Atua.

O lea ua tatou aeae i manuia o le alofa faasoa o le Atua, aemaise o ana faamanuiaga ala eseese mai i lo tatou ola. A o le taui fa'aaliali lea o le tautua tuavae sa faia e o tatou matua ua mavae. Lo latou tautiga lea ua tatou sapi ai. Auā a manatu i le galuega faamisionare i le Pasefika, e tele ni soifua na maumau ai, i le tautua toto, le tautua tuāvae, se'i faaolaola le feau o le Tala Lelei. O le faamalosi foi lea mo i tatou, tatou te fa'aaauu le tautua e pei ona sa faia e o tatou matua. Tatou solisoli mulivae, ma mulumulu'au foe, le tautua tuāvae, le tautua matavela, le tautua lē faalogologo tigā, ona tatou inu malie lea i manuia faavavau o le Atua.

O le mea moni ua amata ona lagona le leo o le tautua, ua musuā, ma ua manumaloina e le fili o le faavaivai. A o le ata lea o le tagata e vaivai lona soifua faatuatua i le Atua. E le gata e faigofie ona poia i mailei a le tiapolo, a e siilima gofie pe a lutaluta le tai o le soifua galue. Ua manatu foi nisi, A ave uma la tupe e tautua ai le Lotu, a e faapefea ona tautua ai le Lotu, a e faapefea ona tautua ai le Lotu? Atonu e sa'o, a e lē 'a'o. Aua lava nei galo i le tagata, o le 'oa tupe ma le tamaoiga o loo tatou sapi ma manuia ai, e lē o ni a tatou mea, a o meaalofa foaifua mai e le Atua. Tatou te ave foi e tautua ai le Atua, ona sasa'a faaua mai lea e le Atua o ona manuia mo i

tatou. A tatou faamaoni foi e ala i la tatou tautua i le Atua, e tautua mai lava e le Atua a tatou fanau, ma faamanuia ia i latou. Aua foi nei faia lau tuatua, ma e faasi'usi'u mata i se taui, pe e te manatu e faoa ai se tulaga manuia o loo i ai se isi uso a tagata, a e ia faia ma le faamoemoe ina ia faaola ai nisi, ia manuia nisi uso a tagata, a e sili ai ia viia ai le Atua. O lea ia tatou faamalolosi, tatou onosai e faatino la tatou tautua tuavae i le Atua, auā o lo tatou faiva lea, a o lo tatou valaauina.

O le soifua tautua o Iesu i Lana galuega faaola, sa feagai ma le tele o luitau, e le gata o upu tau faifai a tagata, a o taitai o le Lotu Iutaia, sa taumafai e faasesē Lana feau. Na oo lava i o'oo'oga o puapuaga, le satauro matagā, o le sasa ma le ta, o le feanu ma le po, a e sa la onosai e faatino Lana tautua, ma se'i faai'uina Lana feau, na auina mai ai o Ia e Lona Tamā, ina ia lavea'iina i tatou mai le agasala. Peitai o Lona maliu ma Lona toe soifua manumalo, o lou manumalo foi lea, oe le kerisiano, o le manumalo foi lea o le Ekalesia a Keriso, mai faigata ma luitau o le soifua tautua i le Atua ma Lona finagalo. A e aua nei galo le au uso e, o le tautua tuavae, o le faiva lea o soo se kerisiano. Ia manuia ona o Iesu. Amene.

**Saunia: Susuga Faresa Faresa FS,  
EFKS Sataoa, Pulega Siumu ma Safata  
Matagaluega FALEALILI SAFATA SIUMU.**

### **MALIU & TOETU @ MATI**

E mafuli le faamamaluina o le Eseta i le masina o Aperila i tausaga taitasi, a o le tausaga nei ua pa'ū'ū faatasi ai le Aso Maliu (aso 29) ma le Toetu (aso 31) i le masina nei o Mati. E fua le faitauga o nei aso faamamaluina, amata mai le Aso Lulu o Lefulefu. E 40 aso mai le Aso Lulu o Lefulefu e oo i le Aso Toonai Paia a o lumana'i le Eseta (vagana ai Aso Sa e le faitauina). O le tausaga 2016 na gata ai talu ai nei, le faamamaluina o le Eseta ia Mati (aso 27). Faato'a toe pa'ū le Eseta i le masina o Mati i le tausaga 2027 (aso 28), a e faato'a toe pa'u i le aso 31 Mati, i le tausaga 2086! E taua lo tatou iloa o nei faitauga, peita'i e sili ona taua ma tatou faamamafa, le iloa o le alofa silisili o le Atua ua na faaola i tatou, e ala i le maliu ma le toetu manumalo o Lona Alo pele e toatasi o Iesu Keriso, lo tatou Alii Faaola ma lo tatou Atua.

# OSIGA FEAGAIGA EFKS LETUI

O le masina nei i lona Aso Lulu aso 20, na osia ai le feagaiga a le EFKS Letui, Pulega Gagaifomauga, Matagaluega ITU O TANE, ma lo latou faifeau susuga *Mathew Simati FS ma le faletua ia Dorothy*, o le Faifeau Nofoaiga i le EFKS Vaimoso Faleata. O le Toeaina o le Pulega, susuga Tanielu Apineru FT (EFKS Safotu) na ta'ita'i le sauniga, o le Tusi Paia na faitauina e Afatia Niue FS (EFKS Fagae), tatalo na saunia e Vavae Maua FS (EFKS Samauga), a o le lauga na saunia e Vaueli Sanerivi FS (EFKS Faletagaloa). Na faatumulia le sauniga mamalu i le afaigaluega o susuga Toeaina ma Faifeau ma latou Faletua o le Pulega Gagaifomauga, faapea le Toeaina Faatonu Faleata, susuga Misipalauni ma Tafao Faatau FT ma le Pulega Faleata Sasa'e, Matagaluega Faleata, ma le mamalu o aiga na lua, o uo ma paaga a 'auga o aute o lea aso. Na molimau le sui o le Aulotu e tusa ma la latou filifiliga, sa faalagolago lava i le taitaiga a le Agaga Paia, ma ua na faasino mai ia te i latou le tali e ala i le palota saoloto a tagata o le Aulotu. Sa faapea foi ona tautino ma folafola e le faifeau lo la'ua loto maulalo i luma o le Atua, e viia lona suafa ona ua la finagalo e fa'aaoga lo la'ua faatauva mo Lana galuega paia. Na ia faafetaia le Ekalesia i Letui ona o la latou tofa ua afe ane ia i la'ua, faapea foi le tapuaiga ma le lagolago a matua ma aiga ma Ekalesia.

Na tauluga le sauniga i le Sakarameta o le Faamanatuga na ta'ita'iina e le susuga Mathew, a o tautuina e le afaigaluega o faafeagaiga a le Pulega. Sa silatoga foi le mamalu o le faapotopotoga i le o le Feagaiga na saunia e le EFKS Letui faapea foi aiga o le faifeau ma lona faletua. Ona faai'u lea i le tausamiga fiafia ma fa'aalologa maualuluga o osiga taulaga i le Atua na ma'au i ai le paia o le Ekalesia i Letui. O Mathew ma Dorothy o le lona 21 ai lea o faafeagaiga, ua sui tulaga i le galuega ina ua maliu le susuga Isaako Lafaele Sefo FS. O le faasologa atu i tua, sa i ai faifeau e 19, e pei o susuga Malo Tanielu FS, Suasua Suasua FS, Tulasaga FS, Faraimo FS, Aurelio FS, Manase FS ma isi talu ona faavae le Ekalesia i le 1833. Ia manuia le galuega, ma ia i le Atua lona viiga e faavavau.

# MALIU IOANE VILIAMU SAMOA

E tulaga ese foi le soifua galue o le susuga i le Toeaina Penisione o le EFKS Aai Niue, e tusa o molimau i lona toe sauniga. O le Faletua ia Vaita'i Samoa, Failautusi Komiti Au Toeaina Amuia Seuala FT, Toeaina Pulega Safotulafai Tesimeta Afamasaga FT, Faafeagaiga Aai Niue/Toeaina Pulega Apia Sisifo Efu Efu FT, ma Metusela V. Samoa AM o le sui o fanau, na latou molimauina le soifua tausaa'ia o se Tamā alofa, Ta'ita'i, Uo, a o se Auauna alofa, faatuatua ma le faamaoni o le Upu ma Sakarameta.

O le ootoga o lona soifua (72 tausaga, 16 aso):  
Fanau Aso Tofi 6/3/52, Maliu Aso Tofi 21/3/24.  
Matua: Samoa Levai & Rosa (Salelologa, Ava, Lano, Taga, Fasito'o-Tai).

A'oga: Salelologa & Fagae Pr, Leulumoega Fou.  
1971-1976 Kolisi Faafaifeau Malua

1977-1979 Faafeagaiga EFKS Samusu

(Na valaauina ma galue i Samusu a o nofo toatasi, a e faaipoipo mulimuli ane ai ma Vaita'i 1977.)

1980-2022 Faafeagaiga EFKS Fogapoa.

Failautusi Pulega Safotulafai ina ua Toeaina Tufi Faapusa FT, toe Failautusi ina ua Toeaina Solomona Tuatagaloa FT.

Komiti Au Taumafai Matagaluega Faasaleleaga.

2016 Toeaina Pulega Safotulafai (5 tausaga).

2017 Sui Peresetene Komiti Au Taumafai.

2021 Toe Filifilia Toeaina Pulega Safotulafai.

2022 Taitai Lotu Nu'u Ese, Fono Tele.

2022 Penisione, 45 Tausaga Faifeau Samoa.

O ona toe sauniga sa faia i le aso 3 Aperila i le EFKS Aai Niue o tautua ai. Taitai - Efu Efu FT, Faaulufale - Dr Latu Latai FS, Tusi Paia - Faatafa Nefu FS, Tatalo - Talalelei Tuafafo FS, Lauga - Laupama Solomona FS. Ua malie toa! Ua malo tau! Manuia lau malaga Tama, tofa, tofa, tofa.

O loo lagomau i lona aiga, Tama o le Pou Seilala i Vaitele fou. Ona faai'u lea o sa'afiafia o lona aso fiafia i le Maota Malae Tapolo Tuanaimato, sa tu tootoo ai le Fetalaiga Leatigaga Matafai Lauina. Faamaise le Tina, le aiga ma le Ekalesia.

*“Ua ou tau le taua lelei, ua i'u ia te a'u le tausinioga, ua ou taofi i le upu o le faatuatua...Ua lelei ia, le auauna lelei e, ma le faamaoni...ina ulufale mai ia i le fiafia o lou Alii.”* **(Saunia: Faatonu Sulu Samoa)**

---

# ***O LE SULU I AAO MA LE MŌLĪ O LE ALA***

---

## ***O LE UPU FAAMAMĀ***

*“3 Ua uma ona faamamāina o outou i le upu na ou tautala atu ai ia te outou.” Ioane 15.*

O Afioga Paia a le Atua e pei o se pepa tala vai e aumai i se fomai. E te lē manaomia se malamalama lelei pe faapefea ona galue nei vai e toe malosi ai lou ma’i – na o le pau le mea e te faia, o le talitonu i le foma’i ma vai ua tusi mai, ma inu pea se’ia uma. E faapena le Afioga paia a le Atua ma lou faitau ai. Pe afai e te fiafia e faitau soo i ai, su’esu’e ma mafaufau loloto i ai, e tutupu ai lagona fou ma uiga matagofie i ou faalogona. Ua faasolo ina leiloa ese atu le malosi o faaososoga ma lona malosi sa soona pulea ai lou mafaufau, ua e maua le malosi fou e tetee atu ai i nei faaososoga. Ua faateleina lou galala e fia faitau pea ma iloa atili le Upu o le ola, ma ua e lagona foi le moni o nei afioga paia i lou olaga. O lona uiga ua faaosofia lou loto e faitau pea i ai e ui ina lē talafeagai le taimi, le nofoaga pe e te manatu ifo e leai se aoga tele.

Fai mai le perofeta o Isaia 55, *“10 Auā e pei ona totō ifo o le ua ma le kiona mai le lagi, a e le toe foi atu i ai, a e peitai e faasūsūina ai le laueleele, ma fua mai ai, ma totogo mai ai, e tupu mai ai saito i lē lūlū saito ma mea e ‘ai i le ua ‘ai; 11 e faapea foi la’u upu e alu atu ai lo’u gutu, e le foi mai fua ia te au; a e peitai e faia le mea ou te loto i ai, e manuia foi i le mea ou te auina atu ai.”* Ia e talitonu o loo galue le upu a le Atua ia te oe. O le upu moni, o lou faitau soo i le Tusi Paia e laveaiina oe mai le fai o agasala, a o le agasala na te taofia oe mai le fiafia e faitau soo i le Tusi Paia. Ina ua mae’a ai lana agasala ma Patisepa, na tusia ai e Tavita e faapea i lana Salamo 119, *“11 Ua ou teu i lo’u loto lau afioga, ina ne’i ou agasala ia te oe.”*

Ua a’oa’o Iesu i ona soo ma i tatou uma i le auala e faamamā, togafiti ma fofō ai i tatou, mai agasala ma faaososoga, *“3 Ua uma ona faamamāina o outou i le upu na ou tautala atu ai ia te outou.”* Ioane 15. Pe afai ua e lailoa i le ola toilalo popo i faiga a le fili ma ana faaososoga, o lea ua faamanatu ma ofoina fua mai le pepa tala vai faaleagaga. E faata’ele, faamamā ma faafou lou mafaufau i aso fai soo i lou faitau i Afioga Paia a

le Atua. E amata mai i ou mata, e sosolo atu i lou mafaufau, e oo ifo i lou loto ma totoga uma o lou olaga, le mana faamamā o le vailaau maua gofie, taugofie, faitau gofie, o afioga paia a le Atua.

I lenei vaega o le soifuaga ua fiafia le toatele e faitau i tusitusiga faasalemausau i luga o upega tafailagi, o loo saili le Alii i nisi latou te filifili e faitau lana Upu, o le upu moni ma le upu ola, e sili atu nai lole fiafia e faitau upu pepelo ma upu fasioti agaga o fai e isi tagata.

## ***‘AUALE FIU***

O la le aposetolo ia Kalatia 6, *“9 Aua nei tatou faapalapala i le amio lelei; auā o ona po e tatau ai tatou te selesele mai ai, pe afai tatou te lē faavaivai.”* Aua le fiu gofie e fai mea lelei mo le viiga o le Atua. Aua le faavaivaia oe i upu ma tala a isi tagata, po o ni mea latou te fai. Ia tumau pea oe i lou faatuatua ma le mata’u i le Atua. Silasila foi i le tamā ia Iopu! A o tapua’i faamaoni o ia i le Atua, ma ola amiotonu i lona talitonuga i le Atua, ma fai amio lelei uma ona o le mata’u ia te Ia, a e tutupu ai mea mata’utia o le soifuaga. Na ia vaai ma le loto nutimomomo a o fai toe sauniga ma tanumia lana fanau e to’a sefulu, na aveesea lona mamalu taualoa na fa’aaloogia ai e tagata, na faapulou e ma’i tigaina ma le lē matogafitia, na faalogo atu i lona toalua o tautala mai i le laulaufaiva mata’utia le ma’ai e mafai ona vaeluaina ai le u’amea, aemaise o paaga a Iopu na latou fai ane o le tele o ana agasala ua oo mai ai nei puapuaga. Peitai, sa le’i faavaivai, sa le’i fiu, sa le’i faapalapala pe fa’inaelo ai Iopu i le faia o le mea lelei – o lona tumau i lona talitonu i le Atua. Ma o se a’oa’oga lelei mo i tatou, e pei ona fai mai Iakopo 5, *“11 Ua outou faalogologo i le onosai o Iopu, ua outou iloa foi le iuga i la le Alii, ina ua mutimuti vale tele le Alii ma le alofa naunau.”* O Iopu sa tausisi ma tulimata’i lana vaai i le taunuuga, na ala ai ona ia onosa’i i tiga sa fetai ai ma ia i lea taimi.

Ioe, e i ai taimi o le soifuaga nei, pe a malolosi tele tofotofoga ma mamafatū le avega, e te manatu ifo ai ua leai se isi laa i luma o totoe a e siilima loa, ua oo mai le toilalo ma o se mea ua tataua ona talia, na o le pau le gaioiga talafeagai o le sola, solomuli, lafoai le faamoemoe a e talia loa le



---

solomuli, tia'i nisi laasaga a e talia loa le i'uga ua oo mai. O le fesili, e faapefea ona e gafataulimaina taimi ogaoga faapenei? A o sauni atu le nuu e ulufale i le nuu folafolaina, na fetalai le Atua ia Iosua, "9 Ia e faamalosi, ma loto tele; 'aua e te fefe, 'aua e te mata'u; auā o le Alii lou Atua o loo ia te oe i mea uma e te alu i ai."

Na ta'ua e se tasi taitai Isaraelu e faapea, 'O le loto tele, o se ituaiga atamai faapitoa, o le atamai e iloa ai ona fefe i le mea e tatau ona fefe ai, ma ia 'aua le fefe i mea e lē tatau ona fefe ai. Mai lenei atamai, e aumai ai le malosi i totonu e faaosofia ai i tatou e tulei pea i luma a o fesaga'i ma faigata tetele. O mea e foliga mai e lē mafai, e masani ona mafai i le loto tele, atamai ma le malosi fou lea.' A o fea e sau ai lenei loto tele? Ina ua e iloa o le Atua o loo i ai o Ia i mea uma e te alu i ai. Aiseā e faamauiina ai i le Tusi Paia le toilalo o tagata e pei o Simona Peteru ma le tupu o Tavita? Ina ia a'oa'o mai ia te i tatou o tagata pei foi o i latou, pe afai tatou te sasi ma pa'u'ū, e mafai lava ona tatou toe fai se isi amataga fou. O le mea lea, ia 'aua le fiu gofie, 'aua le fiu e fai mea lelei e tele, tusa lava pe i ai sina mea leaga e tasi.

### **IA PULEA MEA LAITI**

*"8 A ua **manatu** Tanielu, o le a lē leaga o ia i mea taumafa a le tupu, po o le uaina e inu ai o ia." Tanielu 1.*

O Tanielu na aveese faamalosiā mai lona aiga ma lona nuu, a e ave faapagotā faatasi ma isi tagata i le malo Papelonia, ina ua faatoilalo e le tupu o Nepukanesa le malo Iuta. O mea uma sa faamoemoe i ai le ola o Tanielu na faaleagaina uma – o lona aiga, lana galuega, lona saolotoga, o ana uo ma paaga masani a e maise o lona tulaga aloaia i totonu o le sosaiete. Na faamalosiā o ia e a'oa'o ma tautala i gagana ese ma ola i se siosiomaga sa le'i loto i ai.

Pe afai ana o oe po o se isi foi tagata, mata e faaososoina tatou e taula'i le vaai ma le mafaufau i mea e lē mafai ona pulea ma oo i ai le malosi, e pei o le tu'ua'ia o le Tafeaga ua aafia atu ai tagata uma, pe tu'ua'ia ta'ita'i ma le faiga malo mo le toilalo ua lē malu puipua ona tagatanuu. Ma isi mau tuuaiga faasaga i mea e lē oo i ai le malosi. Peitai, sa le'i faapea Tanielu. Na pulea e Tanielu lona lava mafaufau ma le loto,

ma ia faasaga ifo e tausia lelei lona olaga i mea faigofie, o mea masani ma le laiti o le soifuaga. Fai mai le Tusi Paia, "8 A ua **manatu** Tanielu, o le a lē leaga o ia i mea taumafa a le tupu, po o le uaina e inu ai o ia." O se isi faaliliuga/faitauga o le upu '**manatu/purposed**' – '**faamoemoe ma faamautū lelei i le loto ma le mafaufau.**' Na filifili Tanielu e ola i le soifuaga sa masani ai o ia, i mea faigofie e mafai ona ia pulea. Ma e tāua tele lea ituaiga filifiliga o mea faigofie ma mea iti, auā o mea ia e tapena ai i tatou mo mea tetele, o nai fusuaga laiti e saunia i tatou mo taua tetele. Pe ana lē mafai ma lē iloa e Tanielu ona ia pulea mea laiti, o le fai atu 'leai' i mea'ai ma mea inu, na te lē maua foi le malosi e fai atu ai 'leai' i isi mea tetele mulimuli mai, e pei o le ifo i tupua faapaupau, ma le loto tele e alu i le lua o leona aunoa ma lona fetuutuuna'i e lafoa'i lona faatuatuaga i lona Atua.

Atonu o lenei lava vaitaimi o loo faapologaina ai oe i faafitauli eseese o le soifuaga, ua pei ai oe o se pologa o pulea faamalosi e nisi malosiaga, ua pei ai oe o faatafea; ua lamatia lou aiga ma lau faaipoipoga, o le saogalemu o au meatotino i lou fanua ma lou fale ma aseta, o aitalafu ma le saisaitia i mea tau tupe, o lou faasinomaga ma lou lotoifale, o lau galuega ma ou tofiga. Atonu e lē mafai ona e pulea nei mea, e lē oo i ai lou malosi i ona pogai ma mafuaaga tainane lona toe faaleleia. Peitai e mafai ona e suia lou olaga, ma suia ai le tulaga pagatia o i ai nei, ina ua e amata atu i le pulea o nai mea laiti ma le faigofie. Atonu e pei o Tanielu, e aofia ai le pulea o au mea taumafa ma mea tausami, ina ua 'aua le ausi i mea e lē gafatia lona tau. Po o mea e te matamata ai ma faitau ai i luga o televise ma telefoni ma upega tafailagi. Aemaise o au upu ma tala e sau mai lou fofoga, e faaleaga ai fua nisi tagata, ma lou musu e pulea atu oe e nisi tagata ma lo latou fa'aaogaina o oe. Pe afai e te amata i le '**faamoemoe ma faamautū lelei i lou loto ma lou mafaufau**' e te faapaiaina le suafa o le Alii e ala i mea laiti ma faigofie e te fai, ona e pei lea o Tanielu, e faamanuia oe e le Atua e avatu le malosi ma le loto tele e te lua fetai ai ma faafitauli ogaoga o le soifuaga, ma e manumalo ai i auala e te le'i mafaufauina. Ina ua e pulea mea laiti.

***(Faatonu Sulu)***

---

# ***O LE PEROFETA MULIMULI***

---

***(O le tala faafagogo ua faaSamoaia mai le tusi, 'The Last Oracle' tusia e James Rollins)***

Na iloa atu e Penita le malō o tulimanu o laugutu o Makepalaita. E peisea’i sa i ai se lē fiafia i lenei faalagolago ia Fomai Raeva. Peitai afai sa ta’utino e le Rusia le mea moni, e tāua tele la o ia i le ola ai o le teine.

I lalo o le laulau, na taatia atu ai le lima o Lisa i luga o le tulivae o Penita. O le ie lino umi na ia natia lona gauai atu. Sa latou nonofo i le Potu Laei o le fale povi falai o le Mea’ai Tunu o le Taulaga, o se nofoaga tutoatasi, o se faletalimalo lauiloa i le tele o feagaiga osi ui atu i ie ma ipu mananaia. Sa latou saoloto na o i latou i le potu ‘ai. E mafuli i le gaogao tau leai nisi. E lē mailoa pe sa faatulaga e Mapeletope ina ia mautinoa e tele le faalilolilo tumaoti.

Na oomi mau le lima o Lisa i le tulivae, o loo faailoa atu ai na te talitonuina Fomai Raeva. Na maitauina foi e Penita le vaeluaina o le Rusia ma isi tamaloloa e to’alua. Pe i ai se auala e mafai ai ona fa’aaoga lenei mea mo lona ia manuia?

Na tautala atu Makepalaita. “O loo ia i matou le faletalavai o Fomai Raeva. Afai tou te avatua le teine i se falema’i, o le a matou togafitia loa o ia. Atonu po o le Falema’i Tutotonu o le Ami i Uota Riti.”

Na lūlū le ulu o Penita. Manaia lou taumafai, uso. Na lagolago atu Lisa ia te ia. “O loo ma’ale’ale pea o ia mo se gaioiga. O loo faigata ona faatonutonu le fetafea’i o lona toto pei ona i ai. O se isi faafitauli faapoopo o le a faataotolia tumau ai loa o ia e lē toe matogafitia.”

“E tatau la ona ou alu i ai i le teine,” na fai atu ai Iuri.

Na iloa e Penita ua latou taunuu mai i le tulaga matuitui o la latou faatofalaiga. O le teineitiiti o se tamato vevela faapolokiki ma faasaienitisi. Na ia tuua le teine i le tausiga a Kati ma Seana. O Seana, i lona ave ma faatonu o le TARAPA, sa ia ueloina foi ona agavaa i tua atu o mea o tutupu. O le talanoaga o fai nei ua na o se tumutumu pito i luga o le motu aisa faapolokiki.

Ua leai se isi mea e mafaia e Penita, na o le ave o Iuri i le teine, e solia ai le puipuga faasaogalemu a Sikima – peitai o le mea faanoanoa, na iloa foi e Mapeletope lenei mea. E mai i o latou tali fa’aalia iinei ma le feteenaiga manino i lo latou

va, o le a lē mafai e Mapeletope ona tuu Iuri e alu na o ia.

“O le a ou faatagaina se tagata e toatasi e toalua ma Fomai Raeva,” na fai atu ai Penita.

Na faauiga sesē e Mapeletope lana faatapulaa. “Matou te iloa le mea o i ai le ofisa faatonu o le Sikima, pe afai o le mea lena o loo e fefe e failoa mai. I lalo o le Maota o Simifisone.”

E ui ina sa le tatau ona te’i Penita, a e na fufusi mau ona totoga. Na lavelavea solo tamatama’ilima o Mapeletope i le lavelave o le upega faavaega’au o Uosigitone. Na lapataia e Seana e le umi se taimi o le tamaloa na te iloa ai po o ai lea e aafia a e o fea foi o loo i ai. Ui lava i ona paoa faapolokiki uma, sa le’i mafai e Mapeletope ona maua atu sona avanoa i le malumalu maototonu o Sikima. I tua o vaaiga, e mautinoa sa taumafai pea le tamaloa e sofa’ia o latou faitoto’a. O le manulauti a Seana, ia mautinoa le loka mau ai o na faitotoa.

Sa taofiofi mau pea e Penita ona faalogona ma foliga tutumau. “Po o le a lava le mea e i ai, ou te faatagaina na o le toatasi le tagata na te faafeaoina Fomai Raeva.” Na ia tilotilo atu i le va o tamaloloa e toalua.

Na sii i luga le lima o Makepalaita. “O a’u e alu. E mafai ona fai a’u ma fesoasoani ia Iuri.”

Mai le faataavalega malie o ona mata, e foliga mai sa le’i lagolagoina e Fomai Raeva.

Na faataupupula malosi atu Mapeletope ia Penita, ona luelue malie atu lea. “Peitai o le a matou manaomia se tau lelei mo lo matou lagolago atu,” na ia fai atu ai.

“O le a la lena?”

“E mafai ona outou taofia le teine – peitai amata atu nei, tou te faatagaina mai lo matou oo saoloto atu ia te ia pe a malosi. O ia o se puna’oa matou te lē mafai ona faase’e ese atu.”

“Aua e te taloa mai le tagavai ia te au,” na fai atu ai Penita. “O mea na outou lagolago mai ai ina ia maua lenei teine e i tala atu o tauaofiaga o amioga faaletagata ola.”

“Sa na ona matou faatupea ma ofoina atu fautuaga faasaienitisi i le faaiuga. O le poloketi ia ua leva ona faamautuina. Pe ana matou lē lagolago, e pei ona e fai mai ai, po o penei ua tele se lamatia o lo matou atunuu.” ***(fa’aaauu itulau 11)***

---

# **FA'ASOLOGA FONO TELE 2024**

## **MALUA, ASO 13 - 24 ME**

*“FAAMANAINA E LE AGAGA PA’IA E ATIA’E LE EKALESI A KERISO”*  
*‘Sanctified by the Holy Spirit to Build the Church of Christ’ (Galuega 1 : 8)*

<b><u>ASO</u></b>	<b><u>TAIMI</u></b>	<b><u>FONO &amp; SAUNIGA</u></b>	<b><u>NOFOAGA</u></b>
<b>ASO GAFUA</b> <b>13/05/24</b>	10.00am	Komiti Faatonu	Fale Mafutaga
	7.00am	Asiasiga Komiti o Atina’e	
	1.00pm	Fono Komiti o Atina’e	Fale Fono
	7.00pm	Lotu Talosaga Au Toea’ina	Fale Iupeli
	<b>Ta’ita’i:</b>	<b>Fili S. Matalavea FT</b>	<b>Malua</b>
<b>ASO LUA</b> <b>14/05/24</b>	9.00am	Komiti Au Toea’ina	Fale Mafutaga
	9.00am	Komiti o A’oga	Fale Fono
	9.00am	Faletua Au Toea’ina	Fale o Tina
	7.00pm	Komiti Faamisionare	Fale Fono
<b>ASO LULU</b> <b>15/05/24</b>	9.00am	Komiti o Fe’au Eseese	Fale Fono
	9.00am	Faalapotopotoga Sosaiete Au Taumafai	Fale Mafutaga
	9.00am	TPT: Tautua Puapuaga o Tagata	Fale o Tina
	10.30am	Lotu Tatala ai Fono Tupulaga	Fale Iupeli
	<b>Ta’ita’i:</b>	<b>Matelili Leaana FT</b>	<b>Niusauelese Sisifo</b>
	2.00pm	Pepa mo Tupulaga Talavou	Fale Iupeli
		<i>(Faata’oto fuafuaga mo le Fono a Tupulaga)</i>	
7.00pm	Lotu Au Taumafai	Fale Iupeli	
<b>Ta’ita’i:</b>	<b>Uikilifi Vaifale FS</b>	<b>Niusauelese Sisifo</b>	
<b>ASO TOFI</b> <b>16/05/24</b>	9.00am	Komiti o Tupe	Fale Senetenari
	9.00am	Faalapotopotoga Sosaiete Au Leoleo	Fale Mafutaga
	9.00am	Lotu Mafutaga Tina	Fale Iupeli
	9.00am	Fono Tupulaga	Fale Fono
	1.30pm	TPT: Teine Papauta Tuai	Fale o Tina
	7.00pm	Lotu o Nuu Ese	Fale Iupeli
<b>Ta’ita’i:</b>	<b>Palemia Lafolafo FS</b>	<b>Manukau</b>	
<b>ASO FARAILE</b> <b>17/05/24</b>	5.00am	Lotu Au Leoleo	Fale Iupeli
	<b>Ta’ita’i:</b>	<b>Kuatemane Ulutui FS</b>	<b>Laumua o Aotearoa</b>
	9.00am	Mafutaga Tina	Fale o Tina
	7.00pm	Fono Sosaiete Malua Tuai	Fale Mafutaga



<b>ASO TOONA'I</b> 18/05/24	9.00am	<b>SAUNIGA O LE FAAU'UGA</b> Fale Iupeli
	<b>Ta'ita'i:</b>	<b>Tunumoso S. Iosia FT Sui Taitaifono Fono Tele</b>
	<b>Tusi Paia:</b>	<i>Nomeneta Simanu FT Aana</i>
	<b>Tatalo:</b>	<i>Aviti Etuale FT Vitoria</i>
	<b>Fa'ae'elima:</b>	<i>Tunumoso S. Iosia FT Ta'ita'i Sauniga</i>
		<i>Asotasi Gu Time FT Ta'ita'ifono KAT</i>
		<i>Pouniu Faamausili FT Aukilani</i>
		<i>Misipalauni Faatau FT Faleata</i>
		<i>Fili Matalavea FT Malua</i>
		<i>Makerusa Porotesano FT Amerika</i>
	<b>Tuuina atu A'oa'o:</b> <i>Amuia Seuala FT Failautusi KAT</i>	
	2.00pm	Lotu a Tupulaga Fale Iupeli
	<b>Ta'ita'i:</b>	<b>Viliamu Finau FT Vitoria</b>
	3.30pm	Faafiafiaga Vitoria
	7.00pm	<b>TUFA FAILAA USUFONO</b> Fale Fono

**ASO SA PENETEKOSO**

19/05/24	9.00am	LOTU TAEAO/FAAMANATUGA Fale Iupeli
	<b>Ta'ita'i:</b>	<b>Faatulituli Setu FT Laumua o Aotearoa</b>
		LOTU TAEAO/FAAMANATUGA Fale o Tina
	<b>Ta'ita'i:</b>	<b>Kereta Fuafiva FT Falealili-Safata-Siumu</b>
	6.00pm	LOTU AFIAFI Fale Iupeli
	<b>Ta'ita'i:</b>	<b>Esaroma Fatilua FS Aana</b>
		LOTU AFIAFI Fale o Tina
	<b>Ta'ita'i:</b>	<b>Maaola Sesaroma FS Aukilani</b>

**20 - 24, USUIA LE FONONO TELE**

ASO GAFUA 20/05/24	8.30am	Tapua'iga Amata
	<b>Ta'ita'i:</b>	<b>Esera A. Esera FS (Ta'ita'ifono)</b>
	9.00am	<b>Pepa: Visesio Saga FS (Faia'oga Malua)</b>
	9.30am	Amata Tualumaga o le Fono Tele
	1.00pm	<b>Malua – Faalauiloaina Tusiga</b>
	2.00pm	Fa'auau Tualumaga o le Fono Tele
	5.00pm	Malolo le Fono

ASO LUA 21/05/24	8.30am	Tapua'iga Amata
	<b>Ta'ita'i:</b>	<b>Iosia Evile FT (Penisione)</b>
	9.00am	Fa'auau Tualumaga o le Fono Tele
	1.00pm	Malolo mo sina taumafataga māmā
	2.00pm	Fa'auau Tualumaga o le Fono Tele
	5.00pm	Malolo le Fono
	7.00pm	Faafiafiaga ( <i>Autalavou EFKS Satitooa - Fale Senetenari</i> )

---

**ASO LULU** 8.30am Tapuaiga Amata  
**22/05/24** **Ta'ita'i:** ***Gutu Faasau FS*** ***Penisione***  
9.00am Fa'aaauau Taulumaga o le Fono Tele  
11.00am **Sauniga Aloa'ia Au Penisione** ***(Fale Iupeli)***  
**Ta'ita'i:** ***Esera A. Esera FS*** ***(Ta'ita'ifono)***  
2.00pm Fa'aaauau Taulumaga o le Fono Tele  
5.00pm Malolo le Fono  
7.00pm ***Polokalame - Gambling Control Authority***  
(Laisene o Taaloga Bingo, Lulu, etc. - ***Fale Senetenari***)

**ASO TOFI** 8.30am Tapua'iga Amata  
**23/05/24** **Ta'ita'i:** ***Tavita Roma FT*** ***(Penisione)***  
9.00am Fa'aaauau Taulumaga o le Fono Tele  
1.00pm **Sauniga Aloa'ia Faa'eina Tofi Porofesa**  
***(Pule Kolisi o Malua)***  
**Ta'ita'i:** ***Asotasi Gu Time FT*** ***(Fale Iupeli)***  
2.00pm Fa'aaauau Taulumaga o le Fono Tele  
5.00pm Malolo le Fono  
7.00pm ***Feiloa'iga Au Toea'ina & Afaigaluega Faife'au***

**ASO FARAILE** 8.30am Tapua'iga Amata  
**24/05/24** **Ta'ita'i:** ***Esera A. Esera FS*** ***(Ta'ita'ifono)***  
9.00am Fa'aaauau Taulumaga o le Fono Tele

### **TAUALUMAGA O LE FA'ASOLOGA O LE FONOTELE:**

- 1 Faamaonia I'ugafono Fono Tele 2023**
- 2 Mau Tu'u Sa'o mai Matagaluega**
- 3 Mau Tu'u Sa'o mai Komiti Tetele e Ono a le Ekalesia**
- 4 Faamaonia Galuega a Komiti**
  - (i) Komiti o Tupe
  - (ii) Komiti o Fe'au Eeseese
  - (iii) Komiti o A'oga
  - (iv) Komiti o Atina'e
  - (v) Komiti Faamisionare
  - (vi) Komiti Au Toea'ina
- 5 Palota**
  - (i) Teutupe
  - (ii) Sui Ta'ita'ifono

---

### **FAILAUTUSI AOA O**

---

## **O LE PEROFETA MULIMULI...**

**(mai le itulau 7)**

“Maeu lenei ulo! Pe afai e te kolosia le ituaiga laina lea, e te faaleagaina uma i tatou. O le a le malo lea tatou te taumafai e puipui, pe afai o lena malo na te lagolagoina faiga sauā e manaomia ina ia maua lenei teineitiiti?”

“E faapena ea ona e valea, Koloue? E fou le lalolagi lea ua i ai.”

“Leai, e le fou. O le taimi mulimuli na ou siakiina ai, o le paneta lava lea e tasi o loo taamilo i autafa o le la lava e tasi. Na o le pau le mea ua sui o le tulaga o lo tatou tali atu, o a laina tatou te malilie e kolosi. O loo ia i tatou le gafatia e taofi ai le mea lena.”

Na pupula to’ a atu Mapeletope ia te ia. Na iloa atu e Penita le faai’uga i totonu o mata o le tamaloa. E matua’i talitonu maumaututū le tamaloa, o le mea o loo ia faia e talafeagai, na te le’i iloa se faaletonu o i ai. O se tulaga o le lotomau maumausalī lenei e le mafai ona faafinauina. Na manatunatu Penita po o fea e sau ai lenei ituaiga mautinoa - po o ua na o se lotonuu, pe ua ia afifi o ia i se ituaiga a’oa’oga e puipuia ai o ia mai mea leaga mata’utia sa ia faia, o soligatulafono na te iloa i lona fatu, le matuā mata’utia le ogaoga o le leaga, e lē mafai ona ta’uleleia pe ta’uamiotonuina i soo se auala?

O le a lava le mea e oo i ai, a ua latou le autasi i se faaiuga.

“Ua tatou tau fai malilie i lena tonu?” na fesili atu ai Mapeletope. “A leai, ia tatou faagasolo i luma. O loo i ai lava isi tamaiti.”

Na iloilo e Penita lona fili. Ina ia togafitia le teineitiiti, e leai sona alofaga mai lo la’ua momoe faatasi i le moega faapolokiki ma ia. E le mafai ona tuu e Penita le teine ia oti. O le a ia taumafai e togafitia le tulaga faapolokiki mulimuli ane.

Na luelue malie le ulu o Penita. “O le a se taimi e te avanoa ai?”

Na fai atu Makepalaita. “Ou te manaomia se itula e ao mai ai vailaau a Fomai Raeva.”

“O le a matou faatali atu,” na fai atu ai Penita ma tu i luga, ua uma ai ma le fonu.

Na mulimuli atu i ai Mapeletope ma fālō atu lona lima, e pei ua mae’a le faatauina o se fanua po o se fale. Ma atonu lava o le mea lea ua uma ona latou fai. O Penita ua sauni e faatau atu se vaega tele o lona agaga.

Ui i lea, sa leai se mea na te mafai, na ia faatalofo atu i le lima o le tamaloa.

Sa malulu ma mago le lima o Mapeletope, o lana faatalofo sa maopo lelei i le mautinoa.

O se vaega o Penita na lagona le inoino i lena ituaiga o faai’uga lē maluelue. A e pe mata e lelei le moe a le tamaloa i le po? A o laua ulufafo atu ma le fale’aiga laupapa ma lalo ifo o le mea lanu moana-meamata, na faaletonu lava Penita i se tasi o lafoga na fai e Mapeletope, o se upu na tumu ai o ia i le fememea’i.

O loo i ai lava isi tamaiti.

O ai i latou nei na faatatau i ai lana tala?

10.42 afiafi

Atumauga Urale i Saute

E tatau ona ia alu ese.

Na tamo’e saosaoa atu Monike i le vai taalaolao. O ona tua atu, na faataiō a’e ai le leo o le taika, mai le faleoo, na seleia ai le filemu o le po.

Sakara.

Na taumafai malosi le pusi e a’e mai le faamalama.

Na faateleavave e Monike lana tamo’e.

O luma atu na ia iloa atu ai se vaa laau itiiti i le vai. Na tulei ese e Monike le vaa tuai lea mai pupuvao i se taimi ua tuana. Na ia tafi ese le tele o limulimu ma iloa ai o loo mafai lava e le vaa ona faaopeopea. A e paga lea, sa leai ni foe, ona tago ane lea o Monike ua gagau se la laau umi.

O fafo atu i le mea o loloto ai le vai, na tu ai Konesetatino i le taumuli o le vaa ma faalagolago malosi i le pou na fai faatopetope. Na faatafea mamao ese le vaa. O le mea sili ua sao ese mo le taimi nei.

E pei ona sa fuafuaina, o tamaiti sa fetolofi ese mai lalo o le faleoo a o faasegisege ese taika e Monike. Sa faatali mai le vaa mo i latou e tusa ma le iata mamao ese. E feosofi vave i latou i luga, tulei vave ese le vaa, ma sosola vave agai i le loloto o le vai.

O Monike na tuu e faatasi ane ia i latou – peitai o lona alu ese mai le faleoo sa le’i tulaga lelei e pei ona sa faamoemoe i ai.

O le faatuai na maua ai le avanoa o le taika lona lua – Akati – e saei solo i autafa o le fale o loo mu saesae, o loo gu i le ita ma osofai sa’o loa ia Monike.

---

O le tagipalau patapatatū mai o laa a le taika sa lagona i ona tua. Na taumafai atu Monike mo le pitovai. O le leai o sana auupega, na pau lona faamoemoe o le sola.

Na ia tau mole i lona sela, a e sa tamoe pea.

Na amata ona fenumiai lana vaai i le laufanua.

Ua lata mai le gu a le manu.

Patapatatū taalili mai le leo o lana tamo'e.

Ua leai se mānava.

O le tātā patapatatū o lona fatu ua tatagi i ona taliga.

O le tagi ua maamaai...ua sauni o le a puna mai.

Ua iila mai le vai. A ua mamao tele.

Ua leai se faamoemoe, ona ia liliu lea ma faapa'ū ifo, faasee i lona tua.

Na punou ifo le taika o le a puna i lana toe laa, ae peitai – mai totonu o pupuvao uumi, na osofa'i faafuase'i ane ai se ataata pogisa, ma taia le taika i lona itu. Na emo mai se iila o se naifi i le vaai a Monike. Ona oso atu lea o le ataata pogisa ua puna i luga a'e o le taika, toe faapa'ū i lalo o le palapala, ma osotu atu i totonu o le vao mafiafia ma mou ese.

O Marata.

Sa le'i alu le manukī faatasi ma tamaiti.

O Akati ina ua taia i le lē paleni o lana tu, na lavea tonu i lona itu. Na toe tau tu a'e i luga le taika i ona mai'u'u, a o totolo atu i tua Monike pei se pa'a i ona lima ma vae. A o tifatifa atu le taika, na ia faataiō i se leo gogolo pei o titina e se tasi.

Na tafe ifo se mea uliuli mai le fa'a'ī o le taika, punitia ai ona faalavapua ma liu ataata.

O le toto.

I lalo ifo o lona auvae, na aliali mai ai le 'au o le tama'i naifi.

O le naifi suluga mai le faleoo.

Na pa'ū ese ma leiloa ia Monike ina ua ia sulu.

Na toe maua e le manukī, na ia fa'aaoga, ua lavea'iina ai lona ola.

Na toe manatua e Monike – ma e na te le'i mafai ona ta'ua pe na faapefea ona ia manatua – o ituaiga manukī nei o lo latou natura e mafai ona fa'aaogaina mea faigaluega. Latou te fa'aaoga fasi laau e pu'e ai iniseti mai o latou faamoega. O lala laau maai, latou te tui ma fasi ai tama'i manu Aferika mai totonu o pu o ogalaau.

Ma o Marata e lē se tama'i manukī, e lē faatauva.

Na tagi aueuē ma le gatete solo Akati, a o malemo lana tagi i lona toto.

Na tali mai i ai le tagi a se isi ona uso.

O Sakara, na 'e'e mai i se leo o le faalavelave, na faaoso ai le tiga o le auvae o Monike.

Na tulei atu Monike ma sola agai i le vai. O lona taunuu atu i le auvai o palapala, na ia puna sa'o atu ai i fafo ma taoto i ona manava i totonu o ataata pogisa. Na ia kiki ma aau atu i le mea o loloto ai le vai.

Na faateteleina le faataiō a Sakara i le faalii.

Na faapisi ma taualo mamao Monike ina ia mafai ona osopuna ia lilo i lalo o le vai. O le mālulū na te'a ese ai lona fefe, peitai e oo lava i lalo ifo o le vai, na ia lagona atu ai le tagi a le taika. Na taofi lana manava, ma ia tapili atu ai ona vae pei se lane i le loloto o le vai.

A o faasolo ina pei e mu lona māmā i le mole, na ia ea filemu a'e ai i luga.

Na ia autilo atu i tua i le faleoo. Sa talalī a'e le mumū o le afi i le pogisa. Na iloa atu Sakara i le malamalama, a o ia taamilomilo ai i autafa o lona uso. Sa le'i mafai ona toe minoi le isi taika.

Na lagona atu e Monike le suigi solo mai o Marata i totonu o laau. Na ia fālō ae i luga ma iloa atu lona suigi atu ma faapa'ū mamafa i luga o le vaa laau. Na taatia mamao mai pe sefulu iata.

Na aau atu i ai Monike ma oso atu ai i luga. Na ia taatiatia taliaga, a oti i le mole ma le sela.

O lona itu agavale, na faapupuu ai Marata i lona itu, o luelue malie. Na lagona atu o loo oi o ia. Sa taatia ai Piota i ona luga, o tau faanānā, na fusi ma faaoleole.

Na faasipa atu Monike i lona tulilima, autilo atu i le faleoo, toe vaai atu ia Marata.

A o fai pea le faataiō o Sakara, na aapa atu le lima o Monike ma tuu i luga o le tau'au o le manuki. Sa ia lagonaina le gatetete o lona tino, a o ia punou i le faanoanoa.

O le mea e tatau ona fai, na ia faamafanafana atu ai.

O Akati na matua'i sauāina, soona fasia, na pei a valea i faiga na oo i ai. O le manu sa pei e sili atu ona ave ma sau'ai nai lo se tasi o foafoaga a le Atua.

O le faaumatia o lona ola o se faamanuiaga.

Ui i lea, sa tagi'ū'ū pea Marata.

Sa le'i faigofie le fasiga. I le taumuli o le vaa, na taualo ai e Konesetatino le pou umi ma latou faatafea atu ai i le ogatotonu o le vai.

Na nofo a'e i luga Monike. Sa taia lana vaai i se mea. A o le'i momoe i latou i le po ua tuana'i, sa

---

ia teua uma ai a latou ato i luga o le vaa. Na taula'i lana vaai i le pine sa tautau mai i se sipi. O le masini faatonutonu ai le vevela o le kasa o le ea.

I le malamalama o le mumū o le afi, na manino lelei i le vaai.

O le lanu piniki sa faasolo ina liu pogisa.

Ma e faapena foi e pei o le masini, le tulaga ua oo i ai o latou faamoemoe.

#### 4.31 afiafi.

Uosigitone.

Na fetuutuunai e Iuri le tulutulu o le faagaau mai le ato o le I.V. Na gatete ona tamatamailima a o ia fai lena galuega. Na ia malamalama lelei ia Sasa o taoto i le moega, o ufitia e ieafu ma palanikeke. E sili atu ona leaga le tulaga o i ai nai lo le mea na ia fefe i ai.

Na ia fetuu malie le itula atoa ua maumau, a o ia faatali ia Makepalai ma Mepeletope. O le taimi sa tataua ona amata ai togafitiga o Sasa. Peitai, sa loka o ia i totonu o le fale o le FBI a o faasaga le isi toalua i a la'ua mataupu tau le tagata lava ia. Mulimuli ane ona foi mai lea o Makepalai ma vailaau uma mai le potu o Iuri.

Na latou savalia le Maota, ona latou feiloai lea i fafo o le Maota Simifisone ma ta'ita'i ifo ai i lalo i se lifi tumaoti seia taunuu i le nofoaga malu puipuia i lalo ifo. Na su'e uma i latou, fai o latou fa'ata, ma pupuni o latou mata i solosolo. Na ta'ita'iina o ona lima, ona vave galo lea ia Iuri o lana faavasegaina o lalo o le nofoaga. Na i'u ina latou taunuu i se potu, na tapuni le faitotoa i o latou tua, ma kiliki le loka.

Ona faato'a tatala ese lea o lana mata pulepule. Na iloa e Iuri ua i ai o ia i se potu falema'i itiiti. O se tasi itu sa tele lava i tioata itulua na puipui ai. E toalua nisi sa tutū ai ma tiute i le teineitiiti: o se fafine umi lauulu lanu enaena na faafeiloai mai o lona igoa o Kati Parani, ma Fomai Lisa Kumini, na laua fetau i le faleaiga. Na tuu ane e Lisa se faaputuga o lipoti faafomai.

“O ma'ua o au auauna,” na fai atu ai Lisa. “Ta'u mai pe se a le mea e fia fai.”

Ona faasaga ifo lea o Iuri fai lana galuega. Na ia faitau i lipoti uma, siaki le lipoti o le toto aupito lata mai. O le isi sefulu minute na alu i le fuafuaina o vai ma fualaau. Sa taumafai Makepalai e fesoasoani, a o ia autilo atu i luga o ona tauau.

Na 'ote atu Iuri ia te ia, “Ia e sōsō mamao ese mai lo'u auala.”

E le'i silafia e le au Amerika le alafua o le faasaoina o tamaiti. Na manatu Iuri e taatia ai faapena, ma o le auala sa matuā lavelave e faataugā mai ai i fafo o ia. Peitai na te le mafai ona tuu Sasa e oti aunoa ma lona taumafai e laveai o ia, o le mea lea na ia tuu ai pea Makepalai e tilotilo atu. A e a saogalemu loa Sasa...

Na faalavelave atu Kati a o ia mafaufau mamafa, sa tu i ona tua. “O le a i'u manuia o ia?”

Na fitifiti e Iuri le faagaau o le IV. Na malie o ia i le tafe o le vailaau, ona ia liliu ane lea, ma na ia iloa le faataupupula atu o mata o le fafine ia te ia. Ua nonoa i tua lona lauulu mai ona foliga, ma aliali mai ai le popole i tulimanu o ona mata ma lona gutu.

Na mapuea Iuri ma ofo atu le mea moni. “Ua uma ona fai le mea ou te mafaia. E manaomia le su'esu'e o le vai mai lona tino i itula taitasi, le maualuga ma le malosi o ana feau vai. E ta'u mai ai le tulaga o faasolo atu i ai, a e faato'a tatou iloa mautinoa, i le isi lima pe ono itula, pe mata e ola o ia.”

Na pei e ta'e lona leo i ana upu mulimuli. Na ia faasaga ese, o lona mā e faailoa lona vaivaiga i nei tagata ese. Na ia iloa atu Makepalai o faatau pupula atu ia te ia, ma se emo faatauvaa i ona laumata. Na faasee atu le tamaloa i lona nofoa i autafa o le faitotoa. Na nofo faanapevae ai.

“Na pau le mea tatou te fai o le faatali,” na tomumu ai Iuri a o ia nofo ifo i se nofoa i autafa o le moega. O loo taatia ai i ona luga se tusi a tamaiti. Na punou ifo Kati ma tago i ai. “Na ou faitauina atu i ai ia te ia.”

Na luelue le ulu o Iuri. O le malaga mai iinei i le vaalele, na faalagolago ai e Sasa lona ulu i le lima o Iuri a o ia faitauina atu i ai tala faafagogo faaRusia. Na ia ataata lemu i lona toe mafaufau atu i ai. Na koloni i latou ina ia 'aua nei ola pipii, peitai o Sasa o se teineitiiti sa faapitoa.

Na tago atu lona lima i le itu na aliali mai ai sona tamatamailima mai le ieafu. Na faapipii ai le fua o le toto maualuga. Na faasolosolo lona lima i le fuainumera manifinifi, pei lava o se pepe mea taalo.

Na ia faalagolago i lona nofoa. E umi le taimi o le a faatali ai. Na ta ta e Makepalai lona seevae i le fola o le fale. Na tatagi mai masini o le falema'i.

Ua mae'a nai minute, ona faasee atu lea o Fomai Kumini mai le potu e talanoa ma le vaega su'e toto. O Kati sa mautū ifo i se nofoa fesagai ma le moega.

Ina ua tuanai malie le uluai itula, na maitauina e Iuri se faaputuga o pepa i luga o le laulau autafa o le moega. O le tulimanu o se tasi pepa na taia ai lana vaai. Sa tumu i osiosiga i se peni lanu uliuli. Na iloa i le pito e Iuri, o mea na fai e Sasa. Na ia susu'e nisi pepa, sa le'i malamalama i o latou uiga. Peitai le pepa mulimuli, na ia iloa ai se foliga e masani ai. Na ia faamalō i lona nofoa ma lona te'i.

O la latou pagota sa i ai i le Keliapinisika 88. Na faamafolafola e Iuri le ata. Sa le'i iloa e Makepalai se mea e tasi faasino i le pu'ega o le Amerika. E le'i ta'ua i ai. Ui i lea, sa umi tele ona silaloa Iuri i le ata.

“O lo'u toalua.” Na fai mai Kati i le isi itu o le moega. “Na tusi e Sasa. Ou te talitonu sa ia iloa mai le ata i totonu o la'u 'ato.”

Na lue malie mai lona ulu ma toe ufiufi le ata.

O lana tane...?

“Aisea na ia faia ai lena mea?” na fesili ai Kati. Na ia faataupupula atu i le tamaloa ma le naunauta'i. “O lona tusia o se ata faapea.”

Na faatau pupula ane Iuri i le teine. Na ta ta tetele lona fatu, ma ua faasolo ina lauitiiti lana vaai. O le ata a Sasa na lavea'iina le ola o le tamaloa. A lenei ua iinei le tamaloa lava e tasi. E lē o se mea ua te'i lava ua tupu fua, e i fafo atu o avanoa o mea e ono tula'i mai. O le a le mea lea o loo tupu?

“Fomai Raeva?” na tauliloa atu ai e le fafine.

Na lavea'iina o ia mai le tali atu, i le gasēsē mai o nai minoinoi nini. Na matala mai laumata o Sasa, na faailoa mai ai vai loloto lanumoana. Na punou faalatalata atili atu Iuri. Na tu i luga le fafine.

Na taoto pea ma le mata faanoanoa Sasa, o lana pupula sa vaivai. A o ona foliga ua pei o se faatusa o le fatu, na faasaga atu ia Iuri.

“Tama Pepe...?”

Le igoa lena. Na oso i luga le toto o Iuri i ona taliga ma sa pei e seleia i le aisa. Na ia toe tepa i se alia pogisa i se falelotu, i se tamaitiiti o uu lana pepe meataalo i luma o le fata e osi ai taulaga, o faatau pupula a'e ia te ia i mata nei lanumoana. O upu lava nei e tasi. O tuuaiga lava e tasi. (sosoo atu Sulu Samoa Aperila 2024)

## O E UA MALILIU

### POTO TAVITA FAAI'UASO

(16/7/1948 – 9/2/2023 (74+6+25))

O Poto o le Faletua o le Tiakono. Na fanau mai o ia i le Aso Faraile, 16 Iulai 1948, a e na valaauina e lona Matai i le Aso Tofi, 9 Fepuari 2023; ua atoa ai le 74 tausaga, 6 masina ma le 25 aso o lona soifua. O Poto o se molimau vaaia o le 'auauna lelei ma le faamaoni'. O ia o le faletua o le Tamā Tiakono ia Fuiono Tavita Faaiuasos. Ua matuā iloga lona soifua tautua i le Ekalesia i ona vaega eseese sa tautua ai i tausaga e tele, e pei o le Taitai Pese, o le Taitai Atina'e, Mafutaga Tina aemaise le Faiaoga Aoga Aso Sa. O ia o se Tamaitai Faiaoga Pasi (ECE Registered Teacher) a le Malo, sa supervisor i totonu o le matou Aoga Amata i le silia ma le 20 tausaga (Malamalama Moni Aoga Amata). O se Tina loto fiafia ma fai mea lelei. E lotu alofa i soo se tasi ma lima foai i tagata vaivai ma aiga fou e malaga mai Samoa. E tausai faifeau ma e lē faailogaina se Ekalesia, a e soo se Ekalesia e lagolago ma faamafola i ai ona aao. O se Tina e toaga i sauniga lotu aemaise i Sauniga a le Au Leoleo. E ofo toatasi o ia i Faamati uma, a lē o masini tamea, o pusa aisa o le fale o le faifeau. E faapea foi i le Maota o le Faifeau Metotisi. Na te lē faailogaina le afaigaluega; e tutusa faifeau uma ia te ia.

O ona toe sauniga sa faia lava i le EFKS Palmerston North. O lona sauniga faaleaiga na taitaiina e le Toeaina susuga Ionatana Faaiuasos FT. O le faletua o le faafeagaiga, Tiana Fauolo na molimau fai ma sui o le Aoga Amata, a o Toluono Pasoni le sui o le Ekalesia. O lona toe sauniga sa ou taitai, faitau le Tusi Paia e le susuga Nevin Kuki (Marton), tatalo le susuga Faafetai Milo FS (New Plymouth) a e lauga le susuga Meki Lauvī FS (Masterton). Na molimau mo lona soifua le tamā ia Fuiono Tavita Faaiuasos, o le sui o le fanau Jack David Faaiuasos, a o le sui o fanau o fanau Isamel Faaiuasos, a o a'u i lona soifua faaleagaga. Na faai'u ona toe sauniga i lona oliolisaga tumau i Kelvin Grove, sa ou ta'ita'iina. “Le auuuna lelei e ma le faamaoni, ulufale mai ia i le fiafia o lou Alii.” Ia manuia lau malaga Poto. Ua mālie i le Atua lou soifua tautua.

Saunia: Susuga Periti Fauolo FS

EFKS Palmerston North.



## **TANETAU SEMO KORO**

**16/9/1942 – 25/9/2023 (81+0+10)**

*“27 Ona fai mai ai lea o Lapana ia te ia, Afai e te alofa ia te a’u, ia e nofo mai pea, auā ua ou matuā iloa ua faamanuia mai a’u e le Alii ona o oe.” Kenese 30.*

O Tanetau ‘Mama’ Semo Koro na soifua mai i le Aso Lulu, 16 Setema 1942, a e na valaauina e lona Matai i le Aso Gafua, 25 Setema 2023. Ua atoa ai le 81 tausaga ma aso e 10 o lona soifua. O se tina matua sa tautua i le galuega a le Atua ma lona alii o Dr. Semo Koro i le tofi tiakono i le tele o tausaga, e le gata i Samoa a e faapea foi i le tele o atunuu eseese o le Pasefika sa galulue ai, aemaise le EFKS Palmerston North sa faai’u mai i ai lo la soifua tautua i le Atua.

Sa molimauina e ona aiga aemaise le fanau lona soifua tautua faamaoni i le malo, le atunuu aemaise le Ekalesia. Sa pele ia te ia ona aiga aemaise le au uso Tokelau ma a latou mafutaga fealofani. O se tina aga tamalii ma loto foai i le aufaigaluega a le Atua aemaise le Ekalesia. E lagolago malosi ma tautua faamaoni i galuega fai a le Ekalesia. E toaga i sauniga lotu uma ma fiafia e faitaulaga i le Atua.

O ona toe sauniga sa faia lava i le EFKS Palmerston North. Sa ou molimau i lona soifua faaleagaga, faapea foi le faifeau, o lona alo le susuga Penaia Koro FS ma lona faletua o Lagi, e fai ma sui o le fanau. O Toluono sa molimau o le sui o le Ekalesia. Ona faaiua lea i lona oliolisaga tumau i Kelvin Grove Cemetery.

*“Auā ua ou matuā iloa ua faamanuia mai a’u e le Alii ona o oe.”*

Ia manuia lau malaga Tina Tanetau, o le a le galo lava oe i si a tatou Ekalesia.

**Saunia: Susuga Periti Fauolo FS**  
**EFKS Palmerston North,**  
**Pulega Ueligitone i Matu,**

**Matagaluega LAUMUA O AOTEAROA**

## **MARETA ATOAMAFUAI-**

**UPOLU KUKI**

**(6/6/1933 – 23/8/2022 (89+2+18))**

*“18 Ona alu ai lava lea o le fafine...ua le toe mata faanoanoa.” 1 Samuelu.1.*

*“18 Then the woman went her way...and was sad no longer.” 1 Samuel 1.*

O Mareta Atoamafuaiupolu Kuki na soifua mai le Aso Lua, 6 Iuni 1933. O se tina matua o le Ekalesia ua atoa nei le tausaga o lana malaga faalelagi ua foi atu i lona Matai, i le Aso Lua, 23 Aokuso 2022. Ua atoa le 89 tausaga, 2 masina ma aso e 18 o lona soifua. Ua silia i le 20 tausaga o tautua ma fai tatalo i le Ekalesia i Palmerston North, a e silia i le 40 tausaga o tautua ma lona alii o Atoa Kuki i le Ekalesia ma le afioaga i Tanugamanono i Samoa. Ua lauiloa i le atunuu i lana tautua i le Apia Primary i lona suafa o Mrs. Kuki. O se tina uiga tausaaafia ma loto alofa i soo se tasi, aemaise nai ona aiga ma si ana fanau.

E matauina e le Ekalesia lona faamaoni i sauniga, e tautua faamaoni ma agalelei i le aufaigaluega a le Atua. E loto fiafia ma agamalū aemaise le loto maulalo ma lona fa’aaloalo i le galuega a le Atua. Na maliu filemu o ia i le Maota Gasegase i Palmerston North. Ua 89 tausaga o lona soifua. O ona toe sauniga sa faia lava i le EFKS Palmerston North, sa faatasi atu i ai le toatele o le mamalu o Aiga ma le Atunuu, aemaise o le tele o Ekalesia eseese. Na lagomau o ia i lona oliolisaga tumau i Kelvin Grove Cemetery.


Faafetai le Atua mo Mareta le tina lelei. Ia manuia lau malaga. Tofa soifua. *“Ona alu ai lava lea o le fafine...ua lē toe mata faanoanoa.”*

**Saunia: Susuga Periti Fauolo FS**  
**EFKS Palmerston North**  
**Pulega Ueligitone i Matu,**  
**Matagaluega LAUMUA O AOTEAROA**

***“Amuia e ua oti, o e  
ua oti o i le Alii...”***

# O E UA FAI I LAGI FOLAUGA

**MARETA ATOA KUKI**



**TANETAU SEMO KORO**



**POTO TAVITA FAAIUASO**



Mafutaga Tina Matagaluega APIA, i le Mafutaga Faafouina Faletua Toeaina, Faifeau & Tina Penisione, na faia i le Maota o Tupulaga EFKS Mulinuu, 12 Mati 2024. O le Manatu Autu o le Mafutaga i leni tausaga: OLE FALETUA E MATA'UI LE ATUA, E ALOFA (Eseta 4:16). O le Taitaifono o Faletua Au Toeaina, Meripa Faatulituli Setu (Laumua o Aotearoa) na ia ta'ita'i Sauniga Lotu Amata ma Faai'u o le Mafutaga. E faia pea leni Mafutaga Faafouina ia Mati o tausaga taitasi.